

四庫全書

集部

# 欽定四庫全書

集部

御定歷代題畫詩類卷十八至

詳校官侍郎<sub>臣</sub>李封

主事銜<sub>臣</sub>徐以坤覆勘

總校官降調編修<sub>臣</sub>倉聖脉

校對官編修<sub>臣</sub>吳錫麒

謄錄監生<sub>臣</sub>黃恒謙

欽定四庫全書

御定歷代題畫詩類卷十六目錄

山水類

觀李固請司馬弟山水圖

唐杜甫三首

謝興公上人寄山水簇子

唐齊己

畫山水圖答大愚

唐荆浩

端禮知宗寵示水石六軸戲作此詩歸之

宋李綱

觀僧室畫山水

宋司馬光

偶題看山樓新畫山水

宋文彥博

和吳省副北軒畫湖山之什

宋蔡襄

王原叔內翰宅山水圖

宋梅堯臣

李願秀才善畫山以兩軸見寄仍有詩次韻答之

宋蘇軾

答王道濟寺丞觀許道寧山水圖

宋黃庭堅

酬李唐臣贈山水短軸

宋晁補之

自畫山水寄正受題其上

宋晁補之

題李雲叟畫軸魚鱖寄江安楊簡卿明府

宋范成大

二首

夜聞櫟之誦師曾題畫絕句遐想高致偶成小詩

宋朱子

謝孔遵席後堂畫山水圖

金劉仲尹

孫尚書家山水卷

元劉因三首

松濤軒題畫為鄧善之

元高克恭

贈翰林宅山水圖

元范梈

題高氏所藏畫圖

元陳旅二首

題楊氏所藏畫圖

元陳旅

題鄭德和所藏山水圖

元陳旅

寄張師夔求畫

元吳師道

題山水圖送人歸仙居

元吳師道

為僧作山水

元郭畀二首

題趙氏所藏畫

元鄭韶

題汪功父所藏畫卷

元金履祥

題匡山人所藏圖

元陳基

題畫贈原道

元倪瓚

御製山水圖歌賜長春真人劉淵然歸南京

明宣

宗

題曾郁文所藏山水小景

明劉崧

為臨川章則常題山水圖

明梁寅

題孫卿家小畫

明高啓二首

題武昌魏槃所藏畫

明高啓

題山水畫寄筠州王校文

明周玄

題畫贈沈耀樵先生

明沈貞

題陳世恭所藏山水圖歌

明李曄

題伴讀董時貢所藏山水

明管訥

題高理瞻所藏小景圖

明陳安

題畫送人歸越中

明程本立

為方尚書賓題山水圖

明金幼孜

題山水贈楊熙節

明王直



題周參政所藏山水小景

明李昌期

山水小景

明陳全二首

小景題贈密齋先生

明陳輝

山水圖為兵部郎中王恕題

明倪謙

畫山水為費廷言司業題

明楊守陞

題山水小畫寄姜知縣

明陳憲章

題畫寄徐州陸九臯

明劉溥二首

張侍御世用所藏山水圖歌

明李東陽

贈曹竹西畫并題

明姚綬

題畫寄鄒公履

明李至清

山水圖為錢塘周士庶作

明魏時敏

題山水圖為劉廷信都憲作

明樊阜

山水圖贈南雄黃驛宰

明鄭瑛

為盛舜臣題山水長卷

明吳寬

為僧題畫

明吳寬

為李貞伯題朱寅仲小畫

明吳寬

小景為益之題

明謝弢柱

山水小景為孫太常題

明魯鐸

題畫山水送人還歙

明李夢陽

為吳黃門公美題錢山人叔寶畫

明張鳳翼

題畫贈姜明府

明陳霍

題畫贈蜀中徐閬池

明董其昌

題畫貽毘陵張夢澤

明董其昌

題畫贈張平仲水部

明董其昌

題畫送原字姪巡齊

明董其昌

題畫似雪嶠師

明李流芳

題畫與石夢飛

明李日華

題畫與雲溪上人

明李日華

在課花齋畫小幅山水與沈子廣

明李日華

題畫與曹允大

明李日華

題畫與沈伯遠

明李日華

題畫橫幅與方樵逸

明李日華

題畫繭紙長幅與沈倩伯遠

明李日華

御定歷代題畫詩類卷十六目錄

欽定四庫全書

御定歷代題畫詩類卷十六

山水類

觀李固請司馬弟山水圖

三首

唐杜甫

簡易高人意  
匡牀竹火爐  
寒天留遠客  
碧海挂新圖  
雖對連山好  
貪看絕島孤  
羣仙不愁思  
冉冉下蓬壺  
方丈渾連水  
天台總映雲  
人間長見畫  
老去恨空聞  
范蠡舟偏小  
王喬鶴不羣  
此生隨萬物  
何處出塵氛

高浪垂翻屋崩崖欲壓牀野橋分子細沙岬繞微茫紅  
浸珊瑚短青懸薜荔長浮查並坐得僊老暫相將

謝興公上人寄山水簇子

唐齊己

半幅古屏顏看來心意閒何須尋鳥道即此出人間  
巖暮疑懸欹松深認掩關知君遠相惠免我憶歸山

畫山水圖答大愚

唐荆浩

恣意縱橫埽峰巒次第成筆尖寒樹瘦墨澹野雲輕巖  
石噴泉窄山根到水平禪房時一展魚稱苦空情



端禮知宗寵示水石六軸戲作此詩歸之

宋  
李綱

閩溪盤屈七百里  
贛水湍瀉十八灘  
何人作此極變態  
使我當暑毛骨寒  
小山屹立奔猛裏  
飛浪洶動巉巖間  
喧飀似有雷電響  
回薄乍疑霜雪翻  
枯槎石上盡堅瘦  
蒼波噴浸尺度慳  
畫工不復畫舟楫  
意謂絕險無敢干  
豈知操舟若神者  
出沒濤瀨心甚閒  
崎嶇世路更熾惡  
返視此畫平而安

觀僧室畫山水

宋 司馬光

畫精禪室冷方暑久徘徊不盡林端雪長青石上苔心閒對巖岫目淨失塵埃坐久清風至疑從翠澗來

偶題看山樓新畫山水

宋 文彥博

盡日望西山扶筇復倚欄遠觀猶未足更作畫圖看

和吳省副北軒畫湖山之什

宋 蔡襄

誰於素壁寫江流雲樹疎疎映荻洲盡日清虛全却暑一川搖落似經秋暫逢名畫心猶在終向扁舟老去休

只有遊儵能自適莫懷香餌重遲留

王原叔內翰宅山水圖

宋梅堯臣

石蒼蒼連峭峰大小堯峨雲霧中老松瘦樹無筆蹤巧  
奪造化何能窮古絹脆裂再粘續氣象一似高高嵩上  
有荆浩字特歸翰林公願換廷圭一丸墨誰言賣錢須  
青銅范寬到老學未足李成但得平遠工黃金白璧未  
為寶文人師臣無不通

李頎秀才善畫山以兩軸見寄仍有詩次韻答之

宋  
蘇軾

平生自是箇中人欲向漁舟便寫真  
詩句對君難出手雲泉勸我早抽身  
年來白髮驚秋速長恐青山與世新  
從此北歸休悵望囊中收得武陵春

答王道濟寺丞觀許道寧山水圖

宋

黃廷堅

往逢醉許在長安  
蠻溪大硯磨松烟  
忽呼絹素翻硯水  
久不下筆或經年  
異時踏門闥白首巾冠歌斜更索酒  
舉盃意氣欲翻盆  
倒臥虛樽將八九  
醉拈枯筆墨淋浪

勢若山崩不停手數尺江山萬里遙滿堂風物冷蕭蕭  
山僧歸寺童子後漁伯欲渡行人招先君笑指溪上宅  
鷗鷺白鷺如相識許生再拜謝不能元是天機非筆力  
自言年少眼明時手揮八幅錦江絲贈行卷送張京兆  
心知李成是我師張公身逐銘旌去流落不知今主誰  
大梁畫肆閱水墨我君盤礴忘揖客蛛絲煤尾意昏昏  
幾年風動人家壁雨雪泠泠滿寺庭四圍冷落讓丹青  
笑訓肆翁十萬錢卷付騎奴市盡傾王丞來觀皆失席

指點如見初畫日四時風物入句圖信知君家有摩詰  
我持此圖二十年眼見綠髮皆華顛許生縮手入黃泉  
衆史弄筆摩青天君家枯松出老翟風烟枯枝倚崩石  
蠹穿風物君愛惜不誣方將有人識

酬李唐臣贈山水短軸

李為刑曹杜  
君章知賞

宋 晁補之

大山宮小山霍欲識山高觀石脚大波為瀾小波為淪  
欲知水深觀水津營邱於此意獨親杜侯所與復有人

不見李侯今五載苦向營邱有餘態齊紈如雪吳刀裁  
小毫束筍鱗囊開經營初似雲烟合揮灑忽如風雨來  
蒼梧決滂天無日深巖老樹洪濤入榛林閭漠猿狖寒  
苔蘚浸淫螺蚌溼紛紛禽散江干沙有風北來吹蒹葭  
前洲後渚相隨沒行子漁人歸徑失李侯此筆良已奇  
我聞李侯家朔垂跨河而北寧有之曷不南遊觀禹穴  
梅梁鎖澀萍滿皮神物變化當若斯元君畫史雖天與  
我論絕藝無今古張顛草書要劍舞得意可無山水助

他日李侯人益慕

自畫山水寄正受題其上

宋 晁補之

虎觀他年青汗手白頭田畝未能閒自嬾麥隴無佳思  
戲作南齋百里山

題李雲叟畫軸魚寄江安楊簡卿明府

二首

宋 范成大

蒼烟枯木共荒寒籬落隄礮傍漲湍歸路宛然歸未得  
閒將李叟畫圖看



新圖來自雪邊州  
皴石枯槎筆最道  
明府能詩如此畫  
為渠題作小營邱

夜聞擇之誦師曾題畫絕句  
遐想高致偶成小詩

宋  
朱子

一幅瀟湘不易求  
新詩誰遣送門愁  
遙知水遠天長外  
更有離騷極目秋

謝孔遵席後堂畫山水圖

後堂號  
秀隱居

金  
劉仲尹

家在龍沙弱水東  
竭來塵世笑春風  
都將天外蓬壺景

漏作人間畫手工玉腕雪迴屏管細竇煤香散鳳綃空  
只應大地山河影常記飛鷺下月中

孫尚書家山水卷

三首

元 劉 因

扁舟老樹傍蒼崖好似今秋雪嶺迴試問黃塵山下渡  
幾人曾為看山來

諸公久矣笑吾貪是處雲山欲結菴只有皇卿解贊助  
畫山須畫靜修龕

畫圖題品代移文寄謝神州老使君欲乞龍山恐孤絕

南州隆慮且平分

松濤軒題畫為鄧善之

元高克恭

春雨欲晴時山光弄烟翠林間有高人笑語落天外

贈翰林宅山水圖

元范梈

敏絕丹青手驅馳翰墨場力能移地軸藝直破天荒素  
壁清風起蒼崖旭日光喬林交混沌巨石偃滄浪鶴背  
芙蓉影牛頭薜荔香參差殊不謬奔峭亦非常仙去遺  
真館人來倚釣航向知萬里近不費一生忙擬乞丹沙

洞長尋碧草鄉松喬如可及結友更何方

題高氏所藏畫圖

二首

元陳旅

誰家林麓近溪灣高樹扶疎出石間落葉盡隨溪雨去  
只留秋色滿空山

溪邊春樹綠成羣山崦朝來有白雲客子閒行尋古寺  
石窓巖影與僧分

題楊氏所藏畫圖

元

陳旅

山光濃淡雨初晴曲曲江清樹色明若買草堂江上住

大開窓戶看雲生

題鄭德和所藏山水圖

元陳旅

歷歷清江曲重重綠樹堆林喧春瀑壯雲斷晚山來游  
子還鄉去小窓臨水開更從野橋外隨意步幽苔

寄張師夔求畫

元吳師道

我于山水宿好敦早年畫亦窺其藩却觀作者還自愧  
一朝棄去無留痕張君妙悟自天趣不待師授知根源  
官遊往往得佳勝目力所至氣已吞烟雲莽蒼瀟湘浦

樹石慘澹江南邨漁梁茅屋帶林薄點綴清妍難具論  
宛陵城中數相過雜還縑素方填門謂予雅愛不見索  
豈有強求持璫璫君不見燕公一筆靳豪貴王宰不受  
促迫煩古來奇士多異俗所以千載名長存吾言如斯  
亦非激君諾已定應無諉

題山水圖送人歸仙居

元  
吳師道

仙居直接天台路無數青山與雲樹行人已在畫圖中  
又復攜圖入山去

為僧作山水

二首

元郭昇

門有方袍客圖成水墨山我非求肖似汝亦愛幽閒  
密樹難分辨高雲任往還行當絕世事終老屋三間

有客被方袍合爪前致辭不獨愛公畫仍復愛公詩  
詩成縱意書了此一段奇世人稱三絕公胡不自知我  
心了不知晚歲聊嬉嬉向來用世心轉首成棄遺所  
嗟聞道晚倏已雙鬢絲前賢去已遠來哲未可期  
寓形宇宙間張張欲何之願誨藥石言再拜真吾師

題趙氏所藏畫

元 郊 韶

繡嶺宮前西日暉，忽驚嵐氣上人衣。  
人家隔岸留殘照，樓閣經年掩翠微。  
遊子不知秋已莫，蹇驢直與世相違。  
何當寫我臨流處，黃石橋頭看釣磯。

題汪功父所藏畫卷

元 金履祥

細雨西窗展畫筒，江山杳靄幾重重。  
簷花飛動衣裳冷，疑在雲間第一封。

題匡山人所藏圖

元 陳 基



千尺飛流落半空散為烟雨盡濛濛  
草堂留在匡廬曲  
頭白歸來晝霽中

題畫贈原道

元倪瓚

雪後園林梅已花西風吹起雁行斜  
溪山寂寂無人迹  
好問林逋處士家

御製山水圖歌賜長春真人劉淵然歸南京

明宣宗

東華之東湛明景彩霞環繞蓬萊境  
瓊芝瑤草春不窮

丹光夜動黃金鼎淵然老仙崆峒客萬里歸來此棲息  
手持如意青芙蓉兩臉潮紅頭雪白頭上玉琢冠身中  
雲繡衣朝朝飛神馭炁超汗漫直上太清朝紫微腰間  
騰龍雙寶劍秋水光晶寒澈灩嘯風呼霆作霖雨屢注  
仙瓢蘇下土功成斂用歸希夷玄天至道本無為眼看  
民患忍坐視恤人亦體天之慈旦來謝別何匆匆騎鶴  
逕度江之東江東龍盤虎踞五雲表鍾山翠接三茅峰  
茅家兄弟青冥上白日驂鸞定相訪還來赤松子亦有

安期生上朝南極壽昌星好山好水清且明西方出金  
桃南斗斟霞液長生有曲舞且歌年過廣成千二百

題曾郁文所藏山水小景

明 劉崧

隔溪望見林間屋沙渚陰陰俯羣木溪流合處一橋孤  
春雨來時萬山綠江南此景真可憐米家筆意誰能傳  
却憶故廬珠浦上短籬長繫釣魚船

為臨川章則常題山水圖

明 梁寅

山擁衡廬青水含瀟湘碧兩厓蟠蛟樹千歲蹲虎石遙

遙溯川舟泛泛騎驢客憑高者何人閒看楚雲白

題孫卿家小畫

二首

明高啓

高嶺冒層嵐疎林逗殘照何處覓孫登雲間聽長嘯  
前林遠杵歇別院疎鐘起行人與居人同在秋雲裏

題武昌魏槃所藏畫

明

高啓

楚山遠吐參差碧虛閣開臨繫船石沙樹凋時鄂渚秋  
江鷗沒處湘潭夕閣中幽人坐讀書書聲入水驚龍魚  
欲吹短笛相尋去黃鶴磯頭好待予

題山水畫寄筠州王校文

明周玄

六奇秀南州五老峯西路風壤雖異區英靈總佳譽千  
迴邊海日百丈際江樹蒼翠春到時空濛鳥飛處沾衣  
蘿磴雨宿樵花巖霧適楚偶目新瞻閩屢懷故雅澹浩  
然想解道玄暉句慰爾遠睽離因之裂紈素

題畫贈沈樵先生

明沈貞

春山如黛柳如烟  
畫樓臺小洞天容得踏雲雙短屐  
碧桃花裏訪臞仙

題陳世恭所藏山水圖歌

明 李 暉

米公老手無人繼從此乾坤少清氣畫師落筆頗似之  
素練曲折開秋意上有青山萬疊之嶙峋下有白雲千  
頃之氤氲丹楓翠柏森左右年深乃成十抱文白石坡  
頭野亭小一葉漁舟蕩清曉對岸想像忘機翁坐石蒼  
苔談未了我嘗四載客京華每見畫圖成歎嗟垂老歸  
來愛幽獨欲借雲根半間屋

題伴讀董時貢所藏山水

明 管 訥

公館多清暇林泉愜所探人家如谷口風景似江南  
斷逕荒深蘚崩崖老巨楠鯨波通海去鳥道與雲參  
江艇維晨渚巖扉掩暮嵐雨田收赤黍霜圃摘黃柑  
未染清霜屋先尋白石菴醉來休倚鐻老去願投簪  
許我閒身在從渠俗慮耽偶然忘世累聊復謝林慚

題高理瞻所藏小景圖

明陳安

昔年為客楚江邊雨霽江南二月天楊柳畫橋深淺水  
桃花春岸往來船新蒔白酒浮杯釀旋買青魚出網鮮

因見畫圖驚舊夢東風吹面鬢蕭然

題畫送人歸越中

明

程本立

十年歸夢落滄波一日飛帆渡浙河  
指點南山最青處故巢依舊白雲多

為方尚書賓題山水圖

明

金幼孜

翠崦參差合疎林隱映開白雲生  
野水樹色掩樓臺釣艇烟中去菱歌  
江上來山陰未到賀監幾時回

題山水贈楊熙節

明

王直



郭純永嘉人善畫自時昔興來展豪素滿眼絢金碧水  
樂年中獨擅場拜官得在內作坊時時承詔恣點染九  
重出入生輝光洪熙改元初進位閣門使常言酒後妙  
入神傾倒壺觴不知醉供御之外頗自珍一筆豈肯輕  
與人忽持此幅來贈我令我坐憶江南春江南何處最  
奇勝錢塘西湖誰與並諸山遠近翠若圍豔杏天桃色  
相映橋上行人駿馬過橋邊桂楫揚清波岳王祠下喬  
木老林逋宅前芳草多春光如此佳可賞遠道迢迢心

養養朝回看畫幃無言夜雨寒牕神獨往山陽義士真  
好奇平生脫畧誰得羈昨日到京師秋風露華白訪我  
小瀛洲暫作神仙客飄然復往不可留拂衣欲向東南  
遊題詩卷畫贈爾去相思定倚新城樓

題周參政所藏山水小景

明

李昌期

天壤有異境描摹付良工佳山與秀水幻置軒窓中邨  
邨陌陌皆勝處花竹園林饒雅趣過鳥疑飛却不飛行  
人欲去何曾去松坡竹隄疊更重雪瀑倒濕青芙蓉岡

藥島洞盡在眼樵牧耕釣俱可容九曲溪流漾清泚荒  
渡斜陽見舟尾石上吟翁鎮日留欄前眺客經年倚我  
觀風物似杭州樹木雲霞分外幽豈必西湖有奇勝展  
圖高興亦悠悠

山水小景為銓曹周宋武作

二首

明陳全

散帙落空翠鉤簾覓嵐嶺石徑翳苔花天窓逼雲影孤  
琴如有期興入烟蘿頂

花溪過殘雨青嶂多白雲林亭透水木清暉長在君惟

應采真者相期投鶴羣

小景題贈密齋先生

明 陳輝

長尋幽絕避囂喧野服吟秋到鹿門幾處青山連斷岸  
數家黃葉帶孤邨風潭石瀨清琴響烟徑苔花翳屐痕  
却羨漁樵林下趣白雲相對欲忘言

山水圖為兵部郎中王恕題

明 倪謙

玉堂清暑春風前焚香看畫昏神仙畫中風物得真意  
峰巒隱約披雲烟大山如龍欲飛去小山盤盤如虎踞

奔流一道破山來，散作濤聲滿江樹。  
遠邨微茫三兩家，古渡無人橫斷槎。  
近邨茅屋蔭榆柳，門前沃土饒桑麻。  
別有高亭向洲渚，斜日滿簾水禽語。  
滄波浩浩欲吞天，蜃氣昏昏欲成雨。  
初疑匡廬山下落星灣，又似洞庭湖上之君山。  
瓊宮貝闕倚霄漢，無乃蓬萊方丈非人間。  
我生慣識山中樂，隨意雲樓與山閣。  
故鄉一別今十年，石洞梅花幾開落。  
臨圖忽憶舊遊踪，便欲沿溪上邱壑。  
此身留滯未應歸，回首江天雲漠漠。

畫山水為費廷言司業題

明 楊守陞

一幅驚溪絹縱橫數尺寬良工先潑墨妙手旋施丹物  
象羅胸次天機到筆端宏開千頃澤笈出萬層巒遠近  
濃還淡高低險復安遙岑眉黛蹙列岫劍峰攢濯秀森  
琪樹飛空下玉湍烟霞俱帶潤林壑自生寒幾處重重  
屋誰家曲曲欄空青排闥入澄碧捲簾看紅葉危將墮  
蒼苔濕未乾雲中無犬吠潭底有龍蟠潦盡沙礮路峰  
回石磴盤小橋通別墅輕棹渡前灘觸目皆佳景游心

恣大觀擬尋靈運履猶帶貢生冠  
翫物情休蕩匡時志  
欲彈何當畫無逸持以獻金鑒

題山水小畫寄姜知縣

明

陳憲章

泉聲山色正邦心  
誰寄漁蓑渭水潯  
解點無中含有意  
世間除是畫工深

題畫寄徐州陸九臯

二首

明

劉溥

別後重來未有期  
且憑圖畫寄相思  
秋風黃葉茅亭上  
猶記逢君是此時

目極天涯酒半醒  
楓林斜帶遠山青  
故人家在秋雲外  
百步洪邊水繞亭

張侍御世用所藏山水圖歌

明

李東陽

秋山日落川氣黃  
樹影下映寒潭蒼  
叢篁入林豁蒙翳  
石角路轉山東岡  
茅堂對山復面水  
高者可履深可航  
閉門却埽動經月  
落葉委地苔覆牆  
豈無山客跨款段  
亦有孺子歌滄浪  
吾生早覺簪組累  
十年邱壑成膏肓  
畫圖髣髴見此景  
褰裳欲渡川無梁  
空堂五月燠如火



使我鬱塞迴中腸安得盤陀一片石坐醒殘醉生餘涼  
君今持節行萬里要遣霜雪清炎荒請看窮谷最深處  
或有隱逸藏聲光揚清激濁付公等吾欲拂衣辭太倉  
一度尋思一悵然

贈曹竹西畫并題

明姚綬

白下追遊記昔年青山如畫樹如烟郭家歌舞楊家酒

題畫寄鄒公履

明李至清

一帶雲山如夢裏片帆別處不分明傷心只說寒塘柳

泣雨啼烟送我行

山水圖為錢塘周士廉作

明 魏時敏

佳氣接蓬萊衡門掩綠苔山深雲自合江漲浪初回帆影歸漁浦灘聲落釣臺畫圖殊有興千里共徘徊

題山水圖為劉廷信都憲作

明 樊 阜

我家本在山中住讀書慣識山中趣偶落名塗塵眼昏見山便欲還山去南陽先生官態無半醉示我雲山圖持向簷前再三看青山突兀雲模糊百尺飛泉落松頂

顛厓倒艸晴烟影神仙樓閣牽翠霞薇帳圍香畫長靜  
人家三兩溪南邨桃李成行間對門石逕斑斑過新雨  
花落點破莓苔痕鷗鷺飛迴映沙島夕陽網曬漁舟小  
不是苔川與輞川仙都山下川原杳先生指我山之西  
茅屋數間依竹低茶竈藤牀舊栖隱騷人墨客多留題  
看圖纔了眼初醒人間有此真佳景由來泉石絕纖塵  
當與先生分管領先生大笑清風生片幘佯狂雙鬢星  
題詩卷圖謝鴻鵠浮雲散盡長空青

山水圖贈南雄黃驛宰

明鄭瑛

舟移青嶂夕門掩碧蘿春欲問仙槎客南來第一津

為盛舜臣題山水長卷

明吳寬

城西蕩雙槳遙背伍胥門人家枕河住漸喜厯鄉邨  
豁然見平田農夫荷鋤去好風低嫩苗微雨灑高樹  
葦間多放艇柳下或扳罾錦布芰荷蕩沙明鷗鷺汀  
魚梁接牛宮沽酒新郭市迤邐到橫塘虹橋垂四趾  
亂山似遮路旋轉自長溪水入太湖北雲生光福西  
扣舷唱吳歌

有客中流過千載懷古心悠然欲相和香徑既云沒琴臺亦成空山頭明月上仍照館娃宮登高信徒勞望遠發深喟閒展圖畫看舊游一何類

為僧題畫

明

吳寬

秋風一騎秣陵還未得浮生半日閒畫裏南朝何處寺閉門黃葉滿青山

為李貞伯題朱寅仲小畫

明

吳寬

春半扁舟過太湖洞庭著雨翠模糊惟應舊日同游者

愛此朱郎水墨圖

小景為益之題

明  
謝廷柱

高岸經霜葉半紅  
菰蒲搖颺白蘋風  
秋江一幅新圖畫  
薄暮扁舟載釣翁

山水小景為孫太常題

明  
魯鐸

猶記當年過郢中  
清溪周折碧山重  
聞歌白雪陽春曲  
深樹層軒隔九峰

題畫山水送人還歙

明  
李夢陽

黃山沙溪杳何許圖之山水無乃是軒轅宮宰相里山  
人一出彌荆杞石林漠漠蹊徑苔霜鶴夜悲猿嘯哀紅  
顏踪跡半湖海白頭覽畫思歸來溪頭繫一船畫師本  
無意宛如倦遊者無復舟航事水雲迤邐山雲高靜定  
方知動者勞回思少日歡娛地至今夢寐猶波濤

為吳黃門公美題錢山人叔寶畫

明

張鳳翼

雪川丹青推舜舉百年耳孫步厥武興來弄筆倣松雪  
雲白山青宛村隲石梁策馬覽春輝綠楊一帶映朱衣

御溝澄碧照清影想見仙郎入瑣闥

題畫贈姜明府

明 陳 霍

暮雲春樹路千重雪後看山到處同  
夜永燈寒無過客  
月明江色滿樓中

題畫寄蜀中徐閔池

明 董其昌

青天蜀道不難攀思入微茫杳靄間  
稍著一區揚子宅  
居然秀甲九州山

題畫貽毘陵張夢澤

明 董其昌



朱存行部帶明霞不是桃源即若邪頗憶江南梅信否  
隨風吹向赤松家

題畫贈張平仲水部

明

董其昌

十月江南野色分漁莊荻浦見沙痕若為剪取吳淞水  
著我微茫笠澤雲

題畫送原字姪巡齊

明

董其昌

海岱奇遊盡盪胸虞廷勝事渺難封裝頭亦有家山在  
不必登臺望九峰

題畫似雪嶠師

明

李流芳

千峰頂上只通雲一水人家別有村直到前山蘭若路  
清鐘落日不逢君

題畫與石夢飛

明

李日華

空亭絕壁下烟靄弄晴暉遠望碧天淨橫江一鶴飛  
題畫與雲溪上人

明

李日華

碎石亂堆谷口浮雲遮斷山腰只有尋詩野客乘閒獨  
過溪橋

在課花齋畫小幅山水與沈子廣

明

李日華

石逕逶迤山逕平松光灑落布袍輕手中拄杖拋何處  
滿眼秋山笑獨行

題畫與曹允大

明

李日華

黃石堆牆竹埽雲澗流花落去紛紛讀書聲到樵人耳  
樹擁峰迴又不聞

題畫與沈伯遠

明

李日華

沙柳橫攢千萬枝石根幽瀨咽冰澌人烟雁影茫茫外

正是江干欲雪時

題畫橫幅與方樵逸

明

李日華

雪消春水動涵光  
凍柳垂條未破黃  
不信滄江有詩句  
富春山下問漁郎

題畫繭紙長幅與沈倩伯遠

明

李日華

四山蒼翠合一亭  
貯空虛無事此靜坐  
默念胸中書幽鳥  
忽相喚亂雲落衣裾  
萬象自起伏吾心終晏如

御定歷代題畫詩類卷十六

欽定四庫全書

御定歷代題畫詩類卷十七目錄

山水類

次韻秦少游春江圖

宋陳師道

春山圖

宋文同

題柴言春景山水

宋陸游

草堂春暮橫披

金馮壁

題杜莘老春融秀嶺圖

元王恽

春江小景

元程鉅夫

趙幹春山曲隄圖

元鄧文原

李昭道春江圖

元鄧文原

題趙子昂為袁清容畫春景仿小李

元鄧文原

城南春曉圖

元虞集

題沈君湖山春曉圖詩卷

元楊載

李昭道春江圖

元吳鎮

趙幹春林曲隄圖

元吳鎮

題春林遠岫圖

元黃公望

題春江小景圖

元黃清老

觀杜德常尚書所藏王晉卿畫春山霽景

元周伯

琦

題倪元鎮春林遠岫圖

元鄭韶四首

題綠野春陰圖

元劉永之

題郭熙春山

元劉永之

題溪山春霽圖

元華幼武

為曹僉事畫溪山春曉圖因題 元倪瓚

李遵道溪山春曉圖 元張雨

春山晴靄圖 元張雨

春山嵐靄圖 元張雨

題僧巨然層巒春霽圖 明汪廣洋

春景山水 明張以寧

題溪山春曉圖 明劉崧

周伯寧春晴江山圖 明蘇伯衡



題春景山水

明貝瓊

題溪山春曉圖

明貝瓊

春山瑞靄圖

明張羽

題春山圖

明陳汝言

題春景畫

明解縉

野橋春霽圖

明楊榮

為吏部師尚書題春景

明金幼孜

為宋給事題春景

明金幼孜

題王晉卿春曉圖 明林環

題春景山水 明商輅

山水圖春景 明商輅

題湖山春曉圖 明李東陽

題春景山水 明黃仲昭

題春山圖 明吳寬二首

趙大年春江圖 明吳寬

題春景圖 明謝廷柱

題陳從訓所藏惠崇溪山春霽圖卷

明王叔承

題春山卷

明陳崇德

趙仲穆春山曉思圖

明僧來復

劉宗海為余作清江春雨碧嶂秋嵐二圖

元劉永

之

題柴言夏景山水

宋陸游

題劉德溫畫湖山豐夏橫幅

金趙秉文四首

題長夏雲林

元貢性之

董源夏山深遠

元吳鎮

夏景山水

明張以寧

題夏景畫

明解縉

題夏景

明金幼孜二首

題山水夏景

明貝瓊

山水圖夏景

明商輅

御定歷代題畫詩類卷十七目錄

欽定四庫全書

御定歷代題畫詩類卷十七

山水類

次韻秦少游春江圖

宋

陳師道

翰墨功名裏江山富貴人  
倏看霜鳥下已負百年身

春山圖

宋

文同

岡原草木秀谿谷雲霞媚  
君筆誰所傳獨解吐和氣

題柴言春景山水

宋

陸游

陰陰山木合幽處著柴荆喧中有靜意水車終日鳴

草堂春暮橫披

金馮璧

遷客倚樓家萬里五陵飛鞚酒千金草堂澹與春山對  
幽鳥一聲春已深

題杜莘老春融秀嶺圖

元王惲

三分春事二分空料峭寒生破曉風今日簷前天色好  
山嵐全似卷中融

春江小景

元程鉅夫

翠柳紅桃春滿天  
鴛鴦鸕鶿亂平川  
東風閑遍閒花草  
惟有人無再少年

趙幹春山曲隕圖

元 鄧文原

春雲盡斂青山出  
雨過千林翠猶滴  
桃花歷亂柳芊綿  
兩兩啼鶯在林隙  
短橋深樹阿誰家  
樓閣重重映曉霞  
往來豈是避秦客  
理亂不聞度歲華  
衡門草綠深於染  
迴塘瀲灩流青靛  
雞鳴犬吠各成村  
巖際飛泉如白練  
虛亭寂歷倚江開  
圖畫千重入望來  
桃源山莊何足數

此卷真足稱奇哉畫史當年推趙幹妙筆流傳人所羨  
吁嗟乎人去悠悠不可呼為君賦此期重見

李昭道春江圖

元 鄧文原

江上亂山青束筍平沙草樹望不盡大江入海來滾滾  
吐雨吞雲雜蛟蜃中有崔嵬負絕之高亭遠出晴空寒  
數仞江山傳舍觀英雄英雄盡說孫江東自從得地雙  
鶴翁紫髯一拂豚犬空石田睡起秋屢豐歸耕應羨漢  
陰翁



題趙子昂為袁清容畫春景仿小李

元  
鄧文原

王孫久別同朝侶為寫晴雲百疊峰  
挂起碧牕凝望處  
畫中今喜故人逢

城南春曉圖

元  
虞集

天台先生有山癖臥起無山朝不食  
幾年騎馬聽朝雞  
磊砢諸峰挂霄臆陳生受意不受辭  
竟拈秃筆為埽之  
既安樓觀對奇石復著梁棧橫清漪  
游吾舊游釣吾釣

隔林髣髴聞幽鳥，瓊臺何處無桃花。此是城南暮春曉，夜來天子傳詔呼先生。直上鑿坡趨盤盤，迴復一萬里無限好山并好水。如從島上見陳生，盡寫歸來畫堂裏。

題沈君湖山春曉圖詩卷

元楊載

迤邐沙隄接畫橋，東風楊柳暗長條。鶯隨玉笛聲偏巧，馬受金羈氣益驕。舞榭歌臺臨道路，佛宮仙館入雲霄。西湖春色年年好，底事詩翁歎寂寥。

李昭道春江圖

元吳鎮

晴江一望春山高日光蕩漾翻銀濤白雲冉冉向空落  
長天漠漠歸鴻號岸上垂楊覆瑤草征帆直指長安道  
蛟龍不動兩耳清花落鶯啼入自老鷗夷當日滌烟波  
涼風萬里來天河李侯久向層冥去丹青散逸將如何  
宣和當日珍藏固三百餘年撚指過危君不讓米南宮  
置之武庫尤加護

趙幹春林曲隴圖

元  
吳鎮

亭下人家帶遠岑喬林無處不沈沈垂楊拂岸青歸候

繁杏依邨鳥度音橋外無人尋舊侶湖邊逸客散幽心  
江南絕勝應難紀何似圖中景更深

題春林遠岫圖

元  
黃公望

春林遠岫雲林畫意態蕭然物外情老眼堪憐似張籍  
看花玄圃欠分明

題春江小景圖

元  
黃清老

小艇無人載綠陰白鷗門外筍成林不知多少山中雨  
染得一江春水深

觀杜德常尚書所藏王晉卿畫春山霽景

元  
周伯琦

光風蕩野晴旭柔翠屏螺髻爛不收纖黃嬌綠迷遠近  
翩翩好鳥如相求崖散谷轉一徑幽石梁斜枕清溪流  
輕裘緩帶何處客垂鞭安戀情悠悠尋花問柳不計路  
恍然身世同浮漚頗疑青蓮夢天姥白鹿騰空蹴玄圃  
又疑華陽揭句曲清泉碧石行處足熙寧駙馬思超軼  
前身定是唐宗室豪端萬象窮微茫解衣盤礴非一日

尚書知畫猶知人三銓品第才必真每憐散客猶青眼  
虛齋挂壁同娛神君不見謝家太傅心邱壑九遠軒冕  
秋雲薄造裝束還竟後時至今猿鶴皆寂寞鄴中林慮  
插天外左轄雄文光燄倍角巾甲第良有待好對此山  
看此畫

題倪元鎮春林遠岫圖

四首

元 郊 韶

杏花簾幙看春雨深巷無人騎馬來獨有倪寬能識我  
黃昏躡屐到蒼苔

春色三分都有幾二分已在雨聲中  
牆東兩箇桃花樹恨殺朝來一番風

十日春寒早閉門風風雨雨怕黃昏  
小齋坐對黃金鴨寂寞沈香火自溫

春寒時節病頭風惆悵年華逝水同  
世事總如春夢裏雨聲渾在杏花中

題綠野春陰圖

元劉永之

野色連青靄春流澹碧云  
靡蕪隨處綠離思滿南雲

題郭熙春山

元 劉永之

紫霧春山綠樹齊  
水流花嶼亂鶯啼  
寒驢烏帽歸來晚  
恰似成都濯錦谿

題谿山春霽圖

元 華幼武

雨餘春色浩無涯  
點染溪山麗物華  
野水碧連烟外草  
石林紅映澗邊花  
柳迷深渚漁人市  
鶴傍閒門處士家  
老眼不知圖畫裏  
便須先占白鷗沙

為曹僉事畫溪山春曉圖因題

元 倪瓚



荆溪之水清漣漪溪上晴嵐紫翠圍連舸載書烟渚泊  
提壺入林春蕨肥身遠雲霄作幽夢手栽花竹映柴扉  
磯頭雪影多鷗鷺也著狂夫一浣衣

李遵道溪山春曉圖

元張雨

誰寫江南雨後岑清寒空闊撲雲林何當載我圖書去  
共試野航春水深

春山晴靄圖

元張雨

危亭面懸瀑深隄著茅堂羣木相掩薄風披如有香避

世真樂土欲往川無梁隱淪倘見招歲暮從徜徉

春山嵐靄圖

元張雨

秀色雲林畫未乾一峰天柱倚蒼寒玉人只隔輕烟靄  
三尺圖中正面看

題僧巨然層嵐春霽圖

明汪廣洋

袁一無滄海客瀛洲仙貌如秋鶴照野田手持層嵐春  
霽圖云出畫師僧巨然筆蹤茫昧不可識但見粉墨剥  
落生雲烟青鞵布襪者誰子一琴一鶴相後先山中酒

熟鳴夜泉碧桃流水春風前朗吟一醉三千年不知何  
處有此景興來欲放西津船與君笑傲金焦巔與君笑  
傲金焦巔

春景山水

明  
張以寧

山雨瀑如雪林寒松未花遙看飛閣起知有梵王家一  
僧歸得晚雲濕滿袈裟

題溪山春曉圖

贈蕭  
淵

明  
劉松

土山戴石石角傾偃樹雜出如幢旌青天微茫曉色動

雨氣合沓千峰晴野橋西邊有邨路之子鳴鞘蹋雲去  
重巖花發似聞香隔水鶯啼不知處東南連年飛戰塵  
如此山水何清新石田到處長荊棘豈有荷耒春耕人  
我昨西遊登武姥手扶雲霞望仙府把酒忽逢東海生  
醉卧溪南紫蘿雨紫蘿陰陰覆巖扉十日尋幽行未歸  
雲峰流泉半空落六月飛雪霑人衣拂衣歸隱知何日  
却對畫圖心若失不聞流水渡溪還時見浮雲向山出  
懷哉桃花修竹林江海秋高烟霧深豈無耕釣在田野

誰識悠悠沮溺心

周伯寧春晴江岫圖

明  
蘇伯衡

尚書襟懷絕瀟灑  
揮毫往往凌董馬  
平生一筆頗自珍  
數尺新圖為君寫  
齊山遙接吳山青  
碧波萬頃孤帆征  
東風綠徧汀洲草  
總是岐亭離別情  
一向江南一江北  
離情浩蕩嗟何極  
正如江上之碧波  
縱有并刀那剪得  
當時已足令心愁  
如今況復隔羅浮  
掩圖却上高臺望  
但見遠海連天流  
暮歸朝出誰與侶  
蜃霧蠻烟結悽楚

木棉花落鸚鵡飛苦竹叢深鷓鴣語

題春景山水

明 貝瓊

雨前雨後花滿川春風浩蕩殊可憐  
山人日高眠不起  
勸酒提壺落紅裏

題溪山春曉圖

明 貝瓊

仙家雞犬白雲中水複山迴路不通  
萬樹桃花春似海  
莫教重誤打魚翁

春山瑞靄圖

明 張羽

鶯啼山雨歇前川綠正繁人家在深樹雞犬晝無喧澹  
澹流水意依依田父言漫鼓木蘭楫往遡桃花源

題春山圖

明  
陳汝言

春雨正霏霏春林筍蕨肥魚驚花下艇犬吠柳間扉溪  
水濃如酒山雲白似衣悠然玩清景慮淡已忘機

題春景畫

明  
解縉

春陽忽將違紅芳坐未歇山深雲木凋流水鳴咽樓  
觀隱空青幽人息環轍望來不可親恍然與世別

野橋春霽圖

明 楊榮

東風吹花新雨晴微茫山影開雲屏泉聲有無隔幽竇  
嵐光遠近排空青小橋橫枕西溪側過客何由分野色  
日華潋潋因物榮芳草萋萋為誰碧五更朝下承明廬  
天香滿袖登遊車十年未著謝公屐似與岡巒識面初  
歸來摩娑醉吟目不唱商顏紫芝曲何處有山如此圖  
移近蓬萊剪濃綠

為吏部師尚書題春景

明 金幼孜



碧戶幽窓盡日閒  
落花啼鳥自間關  
白雲野水生春浦  
翠黛芙蓉對曉山

為宋給事題春景

明 金幼孜

江上春山翠作堆  
江頭春水綠如苔  
何人擁騎東風裏  
谷口看花只獨來

題王晉卿春曉圖

明 林環

憶昔扁舟經洞庭  
夜涼落月潮水平  
舟行數里不知遠  
隔林隱隱聞雞聲  
推篷起視西山麓  
烟徑微茫接溪曲

芳草依稀謝朓邨綠樹深沉子真谷須臾旭景開瞳矓  
千山萬山圖畫中誰家樓閣依晴翠朱門繡幕垂東風  
樓外園林春已遍樓中美人夢初斷疎簾半捲落花深  
年華却逐鶯聲換別來烟月幾經秋楚天西望空生愁  
玉堂此日見圖畫髣髴湖山曾舊遊何時拂衣賦歸去  
孤棹還尋舊遊路雨過芳洲春水深更擬褰裳採芳杜

題春景山水

明  
商輅

愛此佳山水春來景更妍四郊青嶂合孤岫白雲連地

迴輪蹄絕峰危石磴懸小橋臨曲澗遠浦接平田鬱鬱  
林間寺潺潺竹下泉桑麻凝暮靄榆柳繞晴川寶殿凌  
千尺茅堂敞數椽僧歸西嶺月漁釣北溪煙倒浸沈波  
塢閒橫古渡船樓高平見日松老不知年鳥度浮嵐外  
鷗飛落照邊吟筇芳草徑酒旆杏花天隔岸聞鶯語開  
軒待鶴旋砌苔深染黛林籟細鳴絃有路通仙境無塵  
遠市廛家山在圖畫觸目思飄然

山水圖春景

明  
商輅

樓閣嵯峨遠岫明  
此中風景似蓬瀛  
抱琴未遇知音客  
閒倚銀鞍信馬行

題湖山春曉圖

明  
李東陽

湖船著水平無舵  
蓬上使篙蓬下坐  
山光四面錦屏開  
橋影中天彩虹臥  
輕鴉拂樹還千點  
老鶴呌空時一箇  
宴客遙將綺席隨  
游人不惜青鞵破  
江南風物今餘幾  
看畫題詩兩無那  
却恐湖山畫不如  
他年自買扁舟過

題春景山水

明  
黃仲昭

春意入遙山漸覺燒痕綠驅犢向東臯一犁雨初足田園樂事多吾將返吾轂

題春山圖

明

吳寬

雲中疊嶂翠模糊深樹茅堂隱若無莫向昔人論畫品開牕聊對謝公圖

春山圖

明

吳寬

平野春雨過危峰殊秀發玉女洗頭罷端如盤髻髮高人攜筇行似畏溪橋滑結伴是何時松林閒採薇

趙大年春江圖

明 吳寬

密林蔽日青蒙茸兩岸都歸烟霧中  
分明罨畫溪頭景只欠垂綸一釣翁  
釣翁莫放扁舟去沙上鴛鴦方好睡  
落盡桃花人不知夜來細雨春流膩

題春景畫

明 謝廷柱

盡收春色此庭中飲具吟瓢未放空  
楊柳渡頭寒食雨杏花村裏酒旗風  
瀑流半捲晴崖白仙觀都涵夕照紅  
坐見樵歸山下路推蓬對畫一漁翁

題陳從訓所藏惠崇溪山春霽圖卷

明  
王叔承

惠崇一詩僧宋首柴周尾丹青入禪觀別自通玄理能  
於尺素間點染千山水昨登金焦興不孤陳郎示我溪  
山圖畫家精工多近俗寫意得神形不足此僧妙趣種  
種魚不滿三尺吳興鱖鉞頭毫末密相接有如螭蟠寄  
蚊睫或言工勝趙大年又云妙超展子虔只須三日坐  
其下一花一草生意全乃知陳郎揮灑信有本恥與當

今畫家混我歌長句君莫嗤惠崇惠崇郎所師

題春山卷

明 陳崇德

高人僻愛春山好一段幽懷盡向開清氣都收詩卷裏  
風光總付酒杯來繁花亂吐紅交白啼鳥驚飛去復回  
却笑紛紛名利客白頭猶自走塵埃

趙仲穆春山曉思圖

明 僧來復

樹色蒼涼曉欲迷石門初入鷓鴣啼桃花不隔秦人路  
流出紅雲水漲溪



劉宗海為余作清江春雨碧嶂秋嵐二圖

賦此贈之

元  
劉永之

劉君早年善山水得意往往圖樵漁西昌城西一相見  
忽然贈我雙畫圖圖中似是清江曲春雨蒼茫汀樹綠  
烟中髣髴辨飛帆水際依微見茅屋漁郎繫船江石上  
一夜磯頭水新長孤邨日暮烟火微渡口歸人暝猶往  
碧嶂層巒翠轉奇嵐光秀色含朝暉風林落葉灑青壁  
雲壑流泉生翠微我昔結廬北山裏每愛秋嵐淨如洗

經年奔走厭風塵偶看新圖心獨喜憑君添我小綸巾  
明當歸埽山中雲他日君來一相訪松根為子開柴門

題柴言夏景山水

宋陸游

懸水三十仞疾雷聞數里正暑凜生秋倚杖者誰子

題劉德溫畫湖山豐夏橫幅

四首

金趙秉文

聞道神仙郭恕先曾將清夜寫湖山而今寶墨歸天上  
時許劉郎見一斑

湖山清夏不應豐一逕林陰水石中六月涼生清藕底

釣魚船上一絲風

風來山脚水淪漣  
林影參差舞鏡天  
袖裏長安遮日手  
綠陰多處弄潺湲

遠處微茫近處濃  
岸容林意兩溶溶  
夏山如醉無人畫  
更倩劉郎作幾峰

題長夏雲林

元貢性之

雨過溪流交響樹  
涼暑氣潛消不是謝  
公別墅定應杜  
老西郊

董源夏山深遠

元 吳鎮

北苑時翻硯池墨疊起烟雲隱霹靂短絢尺楮信手揮  
若有蛟龍在昏黑南唐畫院稱聖工好事珍藏裹數重  
崇山突兀常疑雨碧樹蕭森迴御風鳥啼花落不知處  
漁唱樵歌遐邇度展舒不盡古今情未容肉眼輕將賦

夏景山水

明 張以寧

崖斷石林合風高雲葉飄人歸雨脚外高閣望中遙應  
是天台路幽期在石橋

題夏景畫

明  
解縉

夏雲斂虛壑輕颺散林垌袒裼坐幽宇曾無塵事櫻磴  
泉響非聒聊且陶凡情物態已俱逸樵路無商聲

題夏景

明  
金幼孜

水滿西湖長芰荷白鷗汎汎浴輕波屋頭楊柳深深碧  
門外青山苒苒多

夏景

明  
金幼孜

青山幾疊護雲屏綠樹風涼鳥自鳴最是幽人無一事

捲簾獨坐看黃庭

題山水夏景

明

貝瓊

青林五月不知暑  
玉女曬衣中  
夜雨客至清談酒更添  
白楊梅熟薦吳鹽

山水圖夏景

明

商輅

十里芳塘景最幽  
藕花香裏水光浮  
望來不識人間暑  
羽扇綸巾樂自由

御定歷代題畫詩類卷十七

欽定四庫全書

御定歷代題畫詩類卷十八目錄

山水類

題黃居寀秋山圖

唐徐光溥

次韻和鄧慎思謝劉明復畫道林秋景

宋孔武仲二首

書李世南所畫秋景

宋蘇軾二首

次韻秦少游秋野圖

宋陳師道

秋山圖

宋文同

晚秋烟波圖

宋文同

題童壽卿秋山圖

宋王炎

題柴言秋景山水

宋陸游

秋景

宋陸游

題范寬秋山小景

金劉迎

江天秋晚圖

金王繪

秋江待渡橫披

元元好問

巨然秋山

元元好問



宋高宗題李唐秋江圖

元劉因

題秋塘圖

元陳深

喬達之畫江山秋晚圖

元程鉅夫三首

題祁提點秋山圖

元程鉅夫

秋山圖

元袁桷

子昂秋山圖

元虞集

題秋山圖

元虞集

題巨然秋山

元楊載

題秋山圖

元范村

題周曾秋塘圖卷

元李洞二首

趙千里秋景

元吳鎮

趙子昂秋景

元吳鎮

范寬江山秋霽

元吳鎮

李昭道秋山無盡圖

元吳鎮

李成江邨秋晚

元吳鎮

臨李思訓員嶠秋雲圖

元黃公望

題江鄉秋晚圖

元薩都拉

題秋山圖

元宋本先

題秋日江邨圖

元劉詵

江山秋色圖

元吳師道

秋山圖

元王冕

題秋山圖

元郭翼

題秋山圖

元馬臻

題秋江圖

元舒遜

題周曾秋塘圖

元張珪

題李唐秋山圖

元鄭東

題許道寧溪山秋晚圖

元張天英

米元暉江山秋晚圖

元僧大沂

訪弟長沙霍元瞻雪夜為作秋山圖

明詹同

秋景山水

明張以寧

題秋江小景

明劉崧

題華陽彭玄明所畫秋山圖

明劉崧

題山水秋景

明貝瓊

題宋周曾秋塘圖

明楊基

題趙仲穆秋山圖

明錢宰

題馬文璧秋山圖

明魯淵

秋景小幅

明王行

題畫秋景

明高棟

題秋景畫

明解縉

為侍講時彥題秋意圖

明金幼孜

為吏部師尚書題秋景

明金幼孜

秋景

明金幼孜

山水圖秋景

明商輅

山水秋景

明劉珏

秋景圖

明蘇平

倣王叔明筆意作溪山秋晚卷輒題絕句

明高道素

題野塘秋景

明戈鐫

弘上人蓄秋山圖

明僧大圭



御定歷代題畫詩類卷十八目錄



欽定四庫全書

御定歷代題畫詩類卷十八

山水類

題黃居寀秋山圖

黃休復益州名畫紀云居寀字伯鶯筌少子也畫藝敏瞻不讓

於父蜀之四主崇奢居寀父子入內供奉迨四十年宮殿苑囿池亭牆壁屏幃圖畫不可紀錄授翰林待詔將仕郎試太子諫郎賜金魚袋淮南通好之日居寀與父同手畫四時花雀圖青城山圖峨眉山圖春山圖秋山圖用答國信使命將發秋山全未及畫蜀王令取在庫秋山圖八角居寀與父奉命別畫徑月方畢工更愈於前者光溥進秋山圖歌以紀之

唐  
徐光溥

天與黃筌藝奇絕筆精迴感重瞳悅運思潛通造化工  
揮毫定得神明訣秋來奉詔寫秋山寫在輕綃數幅間  
高低向背無遺勢重疊疊嶂何孱顏目想心存妙尤極  
研巧覈能狀不得珍禽異獸皆自馴奇花怪木非因植  
崎嶇石磴絕游蹤薄霧冥冥藏半峰娑羅掩映迷仙洞  
薜荔纍垂綴古松月檻參浮橋僧老坐楮筇屈原江上  
嬋娟竹陶潛籬下芳菲菊良宵祇恐鷓鴣啼晴波但見

鴛鴦浴暮烟  
幕幕鎖邛邛  
一葉扁舟橫  
野渡颼颼白  
蘋欲起風黯  
黯紅蕉猶帶  
雨曲沼芙蓉  
香馥郁長汀  
蘆荻花撲蔌  
雁過孤峰貼  
遠青鹿傍小  
溪飲殘綠秋  
山秀兮秋江  
靜江光山色  
相輝映雪迸  
飛泉濺釣磯  
雲分落葉擁  
樵徑張瑄松  
石徒稱奇邊  
鷺花鳥何足  
窺白旻鷹逞  
凌風勢薛稷  
鶴誇警露姿  
方原畫山空  
巉巖峭壁枯  
槎人見嫌孫  
位畫水多洶  
湧驚湍怒濤  
人見恐若教  
對此定妍媸  
必定伏膺懷  
愧悚再三展  
向冕旒側便  
是移山

回礪力大李小李滅聲華獻之愷之無顏色髣髴垂綸  
渭水濱吾皇觀之思良臣依稀荷鍤傳巖野吾皇觀之  
求賢者從茲仄席復懸旌宵衣旰食安天下才當老人  
星應候願與南山俱獻壽微臣稽首貢長歌丹青景化  
同天和

次韻和鄧慎思謝劉明復畫道林秋景

二首

宋  
孔武仲

鈴齋清話未更端一掃禪林景趣完縹緲已褰新殿塔

縈紆仍引外峰巒冷風有意生空濶密雪無聲下廣寒  
平昔所遊今在眼淒涼疑是夢中看

以時傳畫雖不費要秋得冬如未完恍疑霰雪滿天地  
慘若暮氣迷峰巒夜堂高張醉魂醒暑館偶窺吟魄寒  
筆端原本闕與造化會莫作人間毫素看

書李世南所畫秋景

二首

宋蘇軾

野水參差落漲痕疎林散亂出霜根扁舟一櫂歸何處  
家在江南黃葉村

人間斤斧日創夷誰見龍蛇百尺姿不是溪山曾獨往  
何人解作挂猿枝

次韻秦少游秋野圖

宋

陳師道

江清風偃木霜落雁橫空若箇丹青裏猶須著此翁

秋山圖

宋

文同

孤峰露蒼骨疎木聳堅榦高堂挂虛壁爽氣來不斷

晚秋烟波圖

宋

文同

直於一丈素寫盡千里景雲山杳杳已成秋烟水漻漻

方入暝君應無心得此畫我豈有言能爾詠

題童壽卿秋山圖

宋王炎

我本山中人築室依澗岡世故驅我來緇塵滿衣裳見  
此山中景我思更深長老樹何離離瘦石何蒼蒼借問  
此何時天寒雁南翔西風有搖落蘭桂含幽芳

題柴言秋景山水

宋陸游

高秋風雨天幽居詩酒地君看此氣象其可折簡致

秋景

宋陸游

秋山瘦嶙峋秋水渺無津如何草亭上却欠倚闌人

題范寬秋山小景

金劉迎

山高最難圖意足不在大尺楮渺千里長江浸橫翠人  
家雜烟樹惆恍徒意會苟或森三尺便若俗子對此畫  
格律嚴興寄獨超邁洗眼映牕明妙處乃不昧流泉見  
原委著屋分向背推車度危橋指路向關隘輕舟最渺  
茫浦嶼如有待山稜瘦露骨汀洲橫若帶木葉黃欲脫  
秋容儼然在霜餘無片雲厯厯數沙界搜尋目力疲欲



賦無可奈近山才四寸萬象紛納芥欲識無窮意聳翠  
更天外

江天秋晚圖

金王繪

萬頃波間蹋浪兒瀟湘秋晚趁歸時四山紅葉風聲健  
散入儂家欸乃詞

秋江待渡橫披

元元好問

物外琴尊合往還爭教俗駕點溪山畫師果識閒中趣  
只作橫舟落照間

巨然秋山

為鄧州相公賦

元

元好問

筆端游戲三昧物外平生往還為問阿師何在白雲依舊青山

宋高宗題李唐秋江圖

元

劉因

秋江吞天雲拍水濤借西風挾不起斷雲分雨入江邨  
回首龍沙幾千里澹菴老筆搖江聲髣髴阿師慘淡情  
千秋萬古青山恨不見歸舟一葉橫

題秋塘圖

元

陳深

水落秋菰老夕寒烟樹微絕憐雙白鷺飛去似知幾

喬達之畫江山秋晚圖

三首

元程鉅夫

遮日西來正暮秋買魚沽酒醉船頭如今見畫渾疑夢  
知是南湖第幾洲

千山木落雁飛初樵屋漁梁路有無京國貴人真巨力  
盡移生計入新圖

別來事事可名家獨我空添兩鬢華天際有山歸未得  
遠峰休著淡雲遮

題祁提點秋山圖

元程鉅夫

仙人縮地古今同  
何處移來水外峰  
我與白鷗曾有約  
可憐相見畫圖中

秋山圖

元袁桷

簇簇麻姑十二闌  
倚空搖落總塵寰  
臥遊京洛誰消得  
一榻松風響珮環

子昂秋山圖

元虞集

翁昔少年初畫山  
丹楓黃竹雜潺湲  
直疑積雨得深潤

不假浮雲相往還  
世外空青秋一色  
牕中遠黛曉千鬟  
瀛洲雞犬同人境  
尚想翁歸向北間

題秋山圖

元虞集

峰迴留深隱  
天清襲素袍  
棲身斷人蹟  
游目送鴻毛  
樹挂栖霞鶩  
藤懸飲子孫  
龍眠石澗冷  
虎撼樹根牢  
木客吟時共  
山樵奕處遭  
浮雲過水盡  
孤月挾霜高  
羽使來三島  
胎仙舞九臯  
左招玉斧飲  
右攬赤松遨  
空色收寥廓  
虛聲起繹騷  
彈琴遺古散  
載酒棹輕舠  
遂向圖中見

誰能世外逃乘槎幾月至一泛九秋濤

題巨然秋山

元楊載

山色嵯峨樹老蒼筆端描邈辨毫芒從來名下無虛士  
可與荆關作雁行

題秋山圖

元范梈

我愛秋景好自緣秋氣清江空石露骨木落風無聲偶  
向畫中見猶如雲外行祗疑豺與虎無地得縱橫

題周曾秋塘圖卷

二首

元李泂

家在東南雲錦鄉。心魂元是水花香。哦詩想入秋塘境。  
鴛鴦驚飛一夕忙。

鮫人初息露香機。花覆龍梭鳥自飛。莫向西湖問烟水。  
夜涼風露濕荷衣。

趙千里秋景

元  
吳鎮

秋光蕭瑟滿林霜。籬菊英英桂子黃。最是西堂風月好。  
不妨遊行樂清狂。

趙子昂秋景

元  
吳鎮

遠山斜日紫烟霏一櫂鴟夷竟不歸  
蕭瑟秋風虛閣表  
詩翁吟罷欲添衣

范寬江山秋霽

元  
吳鎮

滄江遙帶碧雲流紫翠凝巒萬疊秋  
閣倚蛟宮飛雨濕  
人依鳥道動離愁帆歸極浦蒼山合  
木落千林暮靄浮  
豈是筆端分造化無窮巖壑一蘊收

李昭道秋山無盡圖

元  
吳鎮

奇峰倒映青冥立絕壑高懸白霧開  
萬里無雲見秋末



千林有雨向春回

李成江邨秋晚

元  
吳鎮

咸熙畫圖無與共傳世希微愛者衆二李之後已寥寥  
宣和當日尤珍重新圖一旦落人間神宮寂寞何時還  
經營意匠出塵表上下五百誰能攀水迴中有漁舟泊  
山頂崇臺招白鶴籬根浮出水潺潺萬竹琳琅奏天樂  
霜飛木落一天秋棲禽向晚聲啾啾柳溪錯認淵明宅  
過橋豈是王弘儔景色蕭條如太古路僻邨深貯烟霧

分明再見輞川人  
蘇詞何敢輕為附  
清容自是鑒賞家  
持將却向天之涯  
幾回試展未能去  
落盡庭前無數花

臨李思訓員嶠秋雲圖

元

黃公望

蓬山半為白雲遮  
瓊樹都成綺樹花  
聞說至人求道遠  
丹砂原不在天涯

題江鄉秋晚圖

元

薩都拉

沙頭潮下秋水枯  
雲山落日雲模糊  
草堂遠近路長驅  
蕭蕭行李行人孤  
蹇驢度橋歸思急  
村南村北天秋色

何者相呼雞犬聲山前山後烟樹立江風水面吹殘莎  
打魚小艇如飛梭何人蕩槳立船尾釣者船頭腰半駝  
小李將軍不可作粉壁流傳愁剝落石門守者尤好竒  
拄杖敲門索新跋京口綠髮參軍郎見君此畫心即降  
攜家便欲上船去買魚煮酒揚子江

題秋山圖

元  
宋本先

南遊雁蕩北居庸歷歷青山在眼中今日不勝惆悵處  
馬頭黃葉又秋風

題秋日江邨圖

元 劉詵

黃葉秋風趁寒驢平洲遠嶺雁相呼野舟盡日閒無用  
只與人間作畫圖

江山秋色圖

元 吳師道

江南何處景一幅淡含暉草木半黃落樓臺深翠微橋  
連秋水渡船與暮雲歸我亦漁樵客悵然思拂衣

秋山圖

元 王冕

前年放船九江口秋風獵獵吹蒲柳買魚沽酒待月明

不知江上青山走三更吹笛欲喚人溥溥白露侵衣巾  
故鄉遙遙書斷絕空見過雁如飛雲去年却下七里灘  
秋水滿江秋月寒子陵先生釣魚處荒臺直起青雲端  
先生不受漢廷官自與山水相盤桓至今高節敦廉頑  
清風凜凜誰能攀泊舟登岸行復止小徑分歧通草市  
石林掩映樹青紅正與今年畫相似茅廬半住林木裏  
白狗黃雞小如蟻翁媪無言童穉閒可是太平風俗美  
清谿水落魚蟹新東隣釀熟呼西隣相索相把意思真

親密不異朱陳民李端筆力乃巧妙寫我舊日經行到  
豈是老夢眩水墨不覺掀髯發長嘯殷家大樓滄江頭  
留我十日風雨秋觸景感動客邸愁便欲卜築山之幽  
斷橋流水無人處添種梅花三百樹直待雪晴冰滿路  
騎驢相逐尋詩去

題秋山圖

元郭翼

山上浮雲天幾重秋高華散玉芙蓉好攜謝朓驚人語  
醉裏來登落雁峰

題秋山圖

元馬臻

江山萬里舊曾遊，閉裏收將水墨秋。  
記得雙帆投別浦，

老來忘却是何州。

題秋江圖

為黃友仁賦

元舒遜

老樹槎枒石巖崿，隔岸人家紫烟重。  
長江蒼茫日夜浮，天塹西來雲影動。  
駕風上水誰家船，片帆高颺孤雲邊。  
林下伊誰褫襪子，抱琴應訪草堂仙。  
毫端遠勢莫與比，巴陵洞庭秋色裏。  
莫是當年顧虎頭，寫出滄洲千萬里。

題周曾秋塘圖

元張珪

荷枯葦折澹秋塘岸側芙蓉鏡裏妝  
水宿雲飛禽共樂不須別處覓瀟湘

題李唐秋山圖

元鄭東

萬壑霜飛木葉丹石橋流水暮生寒  
却疑二月天台裏一路桃花照馬鞍

題許道寧溪山秋晚圖

元張天英

江山黃落楚雲寒野老巖棲一鴈寬  
賣藥長安不求識



如何飛墨下雲端

米元暉江山秋晚圖

元僧大沂

紅樹宜秋晚澄江媚落暉扁舟如喚我莫待白頭歸  
訪弟長沙霍元瞻雪夜為作秋山圖

明詹同

我愛霍元瞻清標如玉雪蒼松立石厓白鶴鳴海月瘦  
馬衝寒冰在鬚日暮去訪元瞻居高堂中夜燒長燭為  
我寫出秋山圖墨池水凍筆如槩使我見之喜且愕雲

氣忽從衡嶽來雨聲似向瀟湘落二客蘭舟泊遠沙一  
箇茅亭在陰壑感君厚意不可量我欲酬爾明珠璫賈  
傅祠前相別去挂在鵲山青草堂

秋景山水

明張以寧

秋嶽白雲晚霜林紅樹多野橋山郭外行子暮來過為  
問小搖落江南今若何

題秋江小景

明劉崧

秋水無波淨落暉江沙雲樹轉依微望中一片瀟湘意

無數征帆逐雁飛

題華陽彭玄明所畫秋山圖

明  
劉崧

我不識華陽彭煉師見畫雲山想句曲數峰暝色入遙  
浦六月泉聲動虛谷紫霞棲觀當落日似有幡幢出林  
木海邊黿首帶雲紅天際蛾眉拂秋綠昔聞天台雁蕩  
相鈎連雲氣來往駕飛仙斷橋溪澗路如棘嗟爾策蹇  
歸何年秋風湖曲波如烟我思東汎吳江船買魚沽酒  
綠荷渚吹笛夜下松門前便尋煉師覓玄鶴却訪華陽

金定四庫全書  
卷十八  
窺洞天

題山水秋景

明  
貝瓊

田家酒熟當早歸  
天氣漸涼催授衣  
一夜西風破霜蕊  
芳菲不共芙蓉死

題宋周曾秋塘圖

明  
楊基

陂塘九月菰蒲老  
菱葉無多荷葉少  
無數飛來白鷺明  
一羣遊去青鳬小  
寒雲弄影忽成霞  
雁帶斜行下淺沙  
晚色不隨流水去  
秋光都在拒霜華  
當時內殿春風細

紫衣傳教詞臣醉鮑謝文章沈宋才詩成曲盡秋塘意  
塘水秋來景漸疎低煙斜日照平蕪鴛鴦去盡芙蓉死  
空向人間看畫圖

題趙仲穆秋山圖

明 錢宰

人家水檻接山窓好在江南山水邦兩岸雲林皆落日  
一天鳬雁共秋江屋頭數遍青巒九松下吟成白石雙  
野服何人正蕭散泊船歸醉酒盈缸

題馬文璧秋山圖

為盧仲章賦

明 魯淵

野館空山裏林泉象外幽淡雲初霽雨紅葉早驚秋路  
轉山藏屋橋危岸倚舟直疑人境異便欲問丹邱

秋景小幅

明王行

烟碧帶霜紅秋深處處同晚晴山更好詩在野航中

題畫秋景

明高棟

疎林遠岫帶烟霏積水長天合翠微何處寒聲隨落葉  
一行新雁向南飛

題秋景畫

明解縉

秋山風露寒林莽忽摧落山家樂餘暇逍遙在虛壑白  
雲澹無心紅樹相羅絡此景良已佳何用翔寥廓

為侍講時彥題秋意圖

明

金幼孜

長天帶遠景絕島含秋意橋響客時過竹深門獨閉蒼  
烟迴蕭瑟落日生迢遞回首大江西故山何處是

為吏部師尚書題秋景

明

金幼孜

天際涼風瀑布流遙峰積翠雨初收板橋人渡疎林晚  
野寺蟬鳴落葉秋

秋景

明 金幼孜

涼雲雁叫荻花秋  
兩岸青山帶淺流  
向晚月明天似水  
吹簫獨上木蘭舟

山水圖秋景

明 商輅

青山遠近白雲重  
誰識當年把釣翁  
千載嚴陵灘上路  
令人猶自憶高風

山水秋景

明 劉珏

銀河倒挂青山頂  
蒼蚪偃臥芙蓉冷  
烟壑深處起樓臺



雙雙人在蓬萊境我觀斯人非避秦韜輝伏耀全天真  
盡簪愛話無生事恐教名利縈茲身霜葉林邊秋色映  
桂花香裏行厨淨彈琴惟取古為音漉酒還將清比聖  
逍遙此樂人間稀潔已由來世所譏只今四海皆樂土  
不羨羊裘釣石磯

秋景圖

明  
蘇平

雙溪雨過夕流清萬頃烟波入望平兩岸碧峰凝暮色  
一庭黃葉墮秋聲西風遠浦征帆小落日青山去鳥明

金定四庫全書  
卷十八  
寄語讀書林下客莫因高臥謝時名

做王叔明筆意作溪山秋晚卷輒題絕句

明  
高道素

洞庭風欲暮瀟湘雲正秋漁竿隨意好歸興滿汀洲

題野塘秋景

明  
戈鎬

芙蓉秋色滿銀塘白鷺雙飛下晚涼記得采蓮看越女  
醉騎驕馬映垂楊

弘上人蓄秋山圖

明  
僧大圭

萬峰霜晴翠如洗峰底行雲度流水西北高樓爽氣邊  
江南落木秋聲裏蘆葦潮長魚在梁白鷗飛盡天茫茫  
松根丈人讀書處時有疎鐘來上方仙槎影沒銀漢遠  
木末芙蓉為誰剪何處涼風送客船歸來似是東曹掾  
東曹頗笑未識機挂帆直待鱸魚肥山川搖落已如此  
不信草露沾人衣平生畫手不可遇坐閱新圖得真趣  
題詩寄與沃洲僧吾亦買山從此去



御定歷代題畫詩類卷十八